

Nanzningz:

“Vwnzva Veiminz Hozdung” Ndaej Ginzchung Haenhndei 南宁: “文化惠民活动”暖人心

Ndwencieng yaek daengz lo, 2 nyied 2 hauh, Swcigih Dangjvej Senhconzbu、Swcigih Vwnzmingzban、Gvangjsih Vwnzlenz、Gvangjsih Cunghvaz Vwnzva Cuzcinvei doengzcaez cujiz, youq Nanzningz Minzcuz Gvangjangz gawjhengz “Vwnzva Veiminz · Gvangjsih Bouxsuhfazgyah Sij Doiq Soengq Doiq Hozdung”, 60 boux suhfazgyah youq yienhciengz gaem bit sij doiq, sij baenz cien lai fuk doiq soengq hawj cien lai boux ginzchung daeuj camgya hozdung haenx, sij doiq soengq fuk angqcoux ndwencieng.

Aen hozdung sij doiq soengq doiq neix, gaeng guh gvaq 8 gaiq, baenz le aen binjbaiz Gvangjsih vwnzva veiminz gunghcwngz ndeu. Gyoengq suhfazgyah sij doiq, it dwg ndaej hungzyangz caeuq bujiz le conzdungj vwnzva maenhndei guek raeuz; ngeih dwg gyoengqde giethab “sam roengz mbanj”、“seiq haeuj segih” hozdung, bae daengz lajmbanj、hagdangz、ndaw giyez, mienxngaenz bang gyoengq ginzchung sij doiq, saedyienh le caezdoengz yiengjsouh vwnzva cwngzgoj, ndaej daengz ginzchung haenhndei.



▲ Gyoengq bouxsuhfazgyah nyaenga sü doiq.



▲ Cien fuk doiq soengq hawj gyoengq ginzchung.



▲ Ndaw Mbanjdezwnggh ranzlaeuz baiz dem baiz, moqsaksak, gyaundeid dangqmaz.

Lingzconh:

Guh Daegsaek Canjyez Sawj Nungzminz Baenzfouq

灵川: 特色产业富农民

Lingzconh Yen Dagingh Yauzcuz Yangh Daging Cunh Mbanjdezwnggh youq diegbya, diegde bya lai reih noix, daengx mbanj 180 lai vunz, moix vunz cij miz haj faen reih. Cib geij bi gonq, aen mbanj neix cij miz diuz lohnambhoengz ndeu doeng daengz ndaw mbanj, ranzyouq hix cungj dwg ranzngvax ciengznamh, dwg aen mbanj gunghzhoj ndeu.

Guh lajmbanj moq gensez seizde, gyoengq boux lingjdauj aen yangh neix daiqlingx gyoengq nungzminz diuzcingj nungzyez canjyez gezgou, ca ndei hong ndaemmak aen canjyez fouqminz neix, dwk rin gvak bya, guhbaenz baenz benq baenz benq suenmak. Seizneix, Mbanjdezwnggh gungh ndaem makgam、makginghiz 470 moux, moix vunz moix bi souhaeuj 2 fanh maenz.

Vunzmbanj daehngaenz bongz le, dingq cwngfuj doengjit gveihva, ndaw mbanj cienzbouh laebhwnj ranzlaeuz, lij laebbaenz vwnzva hozdung cunghhozlou, lanziuzcangz. Bi 2011, Mbanjdezwnggh ndaej bingz guh “Swcigih Vwnzmingz Cunh Cin”.

(Gicej)

Dasinh: Doxdax Eu Fwen Yenzswngghdai

大新: 举办原生态山歌比赛

Vihliux ciepswnj caeuq fazcanj Dasinh Yen minzcuz ndawbiengz conzdungj minzsuz vwnzva, gyagiengz caeuq dieg seiqhenz guh minzcuz ndawbiengz yisuz baedauq nem gyaulouz, dawz gij minzcuz vwnzva ceiq miz daegsaek Dasinh Yen neix baijyienh hawj vunz lai yawj, mboengqgonq, Dasinh Yen youq yienhsingz gawjbanh Dasinh Yenzswngghdai Minzcuz Minzgenh Yisuzcez Eu Fwen Diuq Foux Doxdax Hozdung. Miz 55 boux canghfwen ndawbiengz、22 aen doih vujdau gaenh 300 lai vunz daeuj camgya doxdax, boux eu fwen ndawde, boux nienzgeij ceiq geq miz 80 bi, boux nienzgeij ceiq saeq ngamq miz 6 bi. Gyoengq boux eu fwen haenx bouxboux cungj gikdoengh baenzmaz, eu fwen haenx saedceij ndei, haenh dangj cwngcwz ndei. Doeklaeng, bouxcanghfwen Dauzcwngz Cin eu diuz fwen 《Fwen Ndei Sing Goksag》aeu ndaej itdaengi ciengj.

(Liuz Yi)



▲ Bouxsenjsouj langh sing eu fwen.

Yizcouh: Cang Gyaeu Gwnzgai Coux Bi Moq

宜州: 扮靓城市迎新年



Ndwencieng yaek daengz lo, youq gwnzgai Yizcouh Si, song baih loh gaeng venj rim le daengloengz hoengzdoengdoeng, batva baij ndaej cingcingj caezcaez, gizgiz cungj seuqsaksak, moqcancan, gyaundeid dangqmaz. Youq gwnzhaw, gyoengq-vunz cawx gak cungj huq gitleih、doiq、bauq daengj hix yied daeuj yied lai.

◀ Gyoengq gunghyinz youq Vwnzva Gvangjangz bakdougiz-siengz baij batva, angq coux ndwencieng.